

四庫全書

集部

欽定四庫全書

明詩綜卷五十四

翰林院檢討朱彝尊編

萬表

六首

表字民望鄞縣人正德末中武進士累官都督同知僉書南京中軍都督府晚號鹿園居士有

玩鹿亭豪

顧玄言云鹿園才清思逸稟履高曠詩如空巖曲瀨宛轉寥夔時復滴瀝

得幽閒真趣有韋應物
深致七言氣骨稍弱

靜志居詩話鹿園裘帶翩翩志存開濟好從方
外遊間與羅達夫唐應德諸公講性天之學值
倭寇為患守土者力不能支公遠結少林寺僧
傳格鬪之法倭猝犯赭山公使釋孤舟統其徒
二百人薄倭營縱火箭擊敗之俄太倉來乞師
公別募月空等十八僧選經師天貲為戰將於
翁家港諸僧衣錦袈裟持杖口含漱藍遇賊以
藍塗面自地躍起若保鬼前搏倭大驚以為神
遂大敗倭追及嘉興之白沙灘盡殲焉後遷官
留都道出蘇州卒遇寇楊涇橋孤軍與戰得出
身中流矢以書報家人曰家世死戰唯吾持丈
墨論議未嘗身將兵今晚年增一箭瘢可無憾
矣蓋萬氏自武略將軍斌戰死阿魯完河予指
揮僉事鍾與靖難兵戰死花園孫明威將軍武
從征交趾師次檀舍江陷陣死武弟文襲兄爵
守桃渚有龍夜戲潮浮水面遙望兩炬光以為

賊火引強弩射之應弦落其一炬不知為龍目也龍負痛騰躍文船漂沒人稱射龍將軍三世不得裹骨歸葬故鹿園書云然鹿園子達甫仲章鎮國將軍孫邦孚汝永都督僉事皆材兼文武達甫有皆非集邦孚有一枝軒橐題江心寺云清磬龍聽法空階月送潮此仲章警句也

憫黎吟 三首

叅政平崖錢公出憫黎諸詠見示惻然傷懷因而有作

地何產枲與速民何畜豕與犢豕犢盈盤吏反嗔枲速窮年采不足刻箭為約安得銷

黎人借錢無約刻箭記之

歲歲生當

剗吾肉負戈因拚一命償嗟嗟黎人誰爾牧

虎兕來猶可奔狼師一來人無存大征縱殺玉石焚昔
人鵬勦只一村鵬勦功成賞不厚大征廕子還廕孫殺
一不辜尚勿為何況萬國多冤魂

鑿而飲畊而食撫黎何事來相逼

舊設有撫黎老人

瘠牛可畊

豈不惜薑水那堪吞滿臆

撫黎逼黎人之財則以薑水灌之

遙明燈火

忽驚疑一望旌旗我心惻

撫黎至黎則明燈揚旗以往

羣黎艸木豈

有知貪吏朘削無休息攻掠犯順誰所為撫黎毒黎還

毒國

夏日飲許貢外山亭即景

一亭梧竹裏迴出市塵間石逕緣蘿入江峰對座閒海
雲朝屢變山鳥暮雙還別去衡茅下思君嬾閉關

江南曲

客從潮陽來夜泊秦淮口鄉語人不知兒童聞拍手

宮人歎

莫向雲屏羨阿嬌暫將清泪度春宵帶圍自此拚長減

待得君王愛細腰

劉 銳 一首

銳字蓄之海鹽人世襲海寧衛指揮使有春臺

集

錢幼卿云海村抽簪邁軸寓意詩篇與瀛洲諸老和酬卓然自振於儔伍

詩話海村少補諸生屢試不利乃食世祿里居賑飢散藥以厚德聞有僕名木善射一日水鶴集資聖寺鳴吻木射之貫其左翮帶矢盤旋良久竟集中庭如臆訴者海村曰嘻必木也命拔其矢縱之不能飛乃命木飼之旬日創愈向主人鳴舞翱翔而去海鹽人至今能道之

和徐東濱

何處幽棲好城西有茂林山來當戶翠竹長隔牆陰哺
子飛梁燕窺魚下水禽閉門無所事亦日任流金

余承恩

四首

承恩青神人官永寧叅將有鶴池詩集

詩話鶴池為太保肅敏公孫肅敏有社稷功世襲錦衣衛指揮其子忤權倖調外衛故鶴池終身不得侍禁籙詩集八卷銅梁張肖甫序之

感興

白日沈西陸返景流東岑端居屏塵翳欣然理鳴琴大

雅僉不悅馳情在鄭音違俗信靡安安可同荒淫達人
宜止足嘉遯我所堪富貴苟非義一唾麾千金

答草池約汎蓉溪

春來花鳥總闕情夜雨愁聽不到明怪殺主人猶病酒
晴江鼓柁放舟行

泛舟

芙蓉溪水三尺強蒼蒼兩岸花艸香若待長江新漲合
撐舟直上小茆堂

望忠州

高江落日片帆秋
岸上魚罾次第收
無數峰巒雲霧裏
舟師指點認忠州

戚繼光

二首

繼光字元敬登州人世襲衛千戶以叅將備倭
浙東大破倭於台州以副總兵鎮福建大破倭
於平海衛閩寇既平以都督同知召理戎政出
為薊鎮總兵進左都督加少保卒謚武毅有止

止堂集

詩話少保平倭之功戰勝攻克撰有紀効新書
在薊日與總制譚公綸樽俎折衝撰有鍊兵實
紀論者比之孫吳韓白焉軍中有暇輒與文士
接席賦詩集名止止索曰愚愚居曰夢夢是亦
好奇矣

盤山絕頂

霜角一聲艸木哀雲頭對起石門開翔風鹵酒不成醉
落葉歸鴉無數來但使雕戈銷殺氣未妨白髮老邊才
勒名峰上吾誰與故李將軍舞劒臺

度梅嶺

溪流百折遶青山
短髮秋風夕照間
身入玉門猶是夢
復從天末出梅關

俞大猷一首

大猷字志輔晉江人世為百戶嘉靖中舉武進
士累官都督同知佩征蠻將軍印進右都督卒
贈左都督謚武襄有正氣堂集

挽薛養果

伐木風不還今古幾心知我與君結契相期弱冠時平生一然諾盛衰永不移我善君相助我過君相規嗟君忽奄逝一老不慙遺昔為暫離別今作長相思戚戚重戚戚良朋今有誰

張通一首

通鳳陽人官至都督僉事

遊西林菴

野寺蕭條一逕微山僧相見語禪機雲深石洞玄猿伏

煙鎖松林白鶴歸上界疎鐘通碧落邊城鼓角送斜暉
浮生自覺渾無定欲解鳴珂問釣磯

周于德

一首

于德號南墩淮安人官至京營都督僉事

平鳥刺江

春蒐馬跡遍南荒夷獠新降罷畫疆絕壑危巖通鳥道
飛旌疊鼓遶羊腸黔瀘東下歸辰浦菁砦西來即夜郎
王化遠行銅柱外炎州萬里盡梯航

張元凱十一首

元凱字左虞吳縣人蘇州衛指揮有伐檀集

元王

美云將軍詩格務躋武德貞觀其語寧有瑕璧而無完珉玦太陳而使之新非有沈深剗刻之思未易

致也

詩話左虞西苑宮詞高出元美之上元美比於沈慶之曹景宗仍以武夫遇之未為知己也

春日游西苑

宣室臨西苑靈臺對籍田宮鶯迷綠雨廐馬飲清川柳引金堤直松含玉殿圓先皇受釐處寂寞鎖春煙

西苑宮詞 十首

肅將上帝祀明堂寶鼎昭回日月光九獻不須歌舊曲
詞臣昨已撰芝房

秋殿清齋正受釐迎和門外立諸姬大官不進麒麟脯
御饌惟供五色芝

陳詞瘞玉奏鈞天西苑宮牆近籍田水旱恐煩祠后土
未央深處好祈年

夕烽千里照甘泉一紙降魔勅已傳急遣六丁乘羽駕

火輪金甲淨幽燕

靈藥金壺百和珍仙家玉液字長春朱衣擎出高元殿
先賜分宜白髮臣

通天臺上接三台景命重臨清醮開拜舞不同郊社禮
科儀一一聖人裁

香通紫氣靄晴空靈貺神休集聖躬垂拱萬年如一日
禮臣何必議青宮

金符寶笈護雲英鸞鶴銜將入上清拜受玉霄龍鳳簡

元陽象一字分明

蓬萊方丈可梯航
勾漏丹砂近寄將
昨貯銀山高幾許
試將玉尺殿中量

瑞氣祥雲薄海濱
遠藩齊獻百千春
進來白鹿高於馬
馴擾金堦不畏人

李元昭 一首

元昭字用晦杭州人世襲千戶有岫嶽山房集

送周虛巖歸吳

返棹歲將晏離亭酒共斟

一作亦深

島雲寒沒影江日凍生

陰莫惜飄蓬跡應傷折柳心丘中別同調聊復理鳴琴

黃喬棟

一首

喬棟字以藩晉江人官叅將

半峰菴聽秀上人彈琴

高僧理鳴琴古調盈人耳
濤生松下風龍起鉢中水
聽罷猶冷然月出疎篁裏

張如蘭

一首

如蘭字德馨南京羽林衛世襲指揮官至淮徐
漕運叅將以子可大貴贈特進榮祿大夫右都
督有功狗集

吳門夜泊

帆影初抽落日斜江橋風湧太湖沙行人莫上蘇臺望
無復吳王苑裏花

秋從夏

一首

從夏字以忠臨清衛人官叅將

月夜同劉天山作

孤館寒燈夜相看聽晚笳清宵醒客夢明月落梅花碧海潮聲急清霜雁影斜不堪憐歲暮況復是天涯

袁應黻

一首

應黻字仲子揚州興化人守備

鄭司馬入塞歌

十載籌邊鬢欲秋玉門生入未封侯君王豈惜師中命尚有山陰十六州

奚汝嘉 一首

汝嘉字子美江都人揚州衛百戶

旅懷

十日雨初霽一年春已殘
苔痕蝕徑滑艸色釀陰寒
昔悔從軍易今悲作客難
殊方有桃李能得幾回看

陳鶴 十首

鶴字鳴野紹興山陰人世襲百戶有海樵集 王敬

美云鳴野詩飄宕悽惋 顧玄言云鳴野詩初
擬貞觀以還晚得大厯中格 錢去病云海樵

七古流麗似李頎七

絕爽朗似王昌齡

詩話海樵家居怪山之麓金庭閣老其女夫也
山上有息柯亭傳是閣老所建而海樵集中酬
周山陰張會稽攜酒見訪之作中云相攜直上
息柯亭恐是海樵故宅中物矣五言如近海潮
通郡連山瘴入樓山川留別夜風雪望鄉人孤
月長隨棹寒潮自到門繞廬松葉暗穿竹水聲
齊明月幾家好故人今夜俱七言如床下鳴蛩
偏入夜風前白苧不宜秋風塵會面猶難卜世
事傷心只自知細雨殘燈歧路酒清江紅葉寺
門舟薄游兩見雁歸塞多病却憎花滿樓高士
遠栖滄海曲好山多近永嘉場山深倦鵲猶依
樹風定飛螢忽上樓比於田水月雖才鋒不及
而鑄詞

差醇

夜坐見白髮寄別朱仲開張甌江

坐久北風起江聲帶遠沙
客愁初到鬢鄉夢不離家
林靜無殘葉燈寒有落花
懷君夜難寐別緒轉如麻

高郵贈龔山人

近苦江東水轉憐淮北居
入秋嘗白稻留客繪青魚
樹柵春收犢穿潮夜灌渠
期君結鄉社同著養生書

泊京口望金山寺

南徐一片石千古柱中流
繞樹開僧舍緣空結梵樓
疎

燈明水底落月挂潮頭向晚禪鐘起風吹到客舟

題楊法部容閒閣

閣傍江城外春開雲水間祇因塵境遠自覺主人閒
日落見歸鳥月明看遠山移船候潮至相送野僧還

寫山水

夜來風雨惡落葉打柴關曉起敞溪閣亂雲猶在山

題畫贈姜明府

暮雲春樹路千重雪後看山到處同夜永燈寒無過客

月明江色滿樓中

送張伯淳還關中

憐君獨棹渡黃河西北山川入雅多
料得到家春未至馬啼半在雪中過

送王諫北上

東去春潮到驛門半江風雨近黃昏
由來知己難為別不是殷勤戀酒尊

吹笛懷友

玉笛橫吹入夜分中天華月度流雲苔川兩岸春風起
飛盡梅花不見君

池上聽陳老琵琶

夜深池上弄琵琶萬里銀河月在沙莫向尊前彈出塞
只今邊將未還家

陳第十一首

第字季立號一齋連江人初為學官弟子俞都
督大猷召致幕下教以兵法起家京營出守古

北厯遊擊將軍有寄心集五岳兩粵游草

詩話一齋投筆從軍受知於譚襄毅俞武襄戚
武毅三公江陵既沒論者謂武毅不宜於北徙
之嶺南一齋作塞外燒荒行有云年年至後罷
防賊出塞燒荒灤水北枯根朽草縱火焚來春
突騎飢無食又云隆慶二載譚戚來文武調和
費心力從前弊政頓掃除臺城兵器重修飭迄
今一十五年間閭閻雞犬獲寧息譚今已死戚
復南邊境危疑慮叵測患難易共安樂難念之
壯士摧顏色論者不引今昔觀紛紛搜摭臣滋
惑又送戚都護絕句云轅門遺愛滿幽燕不見
烽煙十六年誰把旌麾移嶺表黃童白叟哭天
邊誦其詩扼腕於封疆之事深矣一齋儲書最
富余嘗游閩臨發林秀才侗持其後人所輯世
善堂書目求售燈下閱之見唐五代遺書琳琅

滿目如披靈威唐述之藏多平生所未見不覺
狂喜秀才許至連江代購踰年得報書則已散
佚徒有悅
惜而已

歲暮客居呈弱侯

仲尼本周流忽發歸與歎意在就六經匪為思鄉串嗟
我老無聞託興游汗漫邈想古通人反側常宵半秣陵
一君子少小登道岸嗜學自性成義易旦夕翫近得從
之談恍上中天觀詩書數千載立語窮真贗欣然遂忘
家何知有歲晏

邵武舟次

樵川泛輕舟青山起當面薄霧頻往還奇峰互隱見灘
灘若峻坂下下如飛箭秋容西楚同人語南方變茂樹
雜村煙澄溪勝江練始知溯洄艱轉喜隨流便對景持
一杯慢亭未足羨

禹碑行

岳麓神禹碑何年鐫刻之真蹟雖莫窺字體殊偉奇儼
如冠冕之獨立矯若鳳鳥之來儀或盼而連目或聳而

並肩或展而雙足或握而兩拳神藏蘊蓄意騁蹁躑既
非鳥跡之踏踏亦非垂露之涓涓篆隸八分抑又邈焉
計厯年之既久何點畫之新妍豈鬼神之默護故歲久
而彌鮮據譯讀之恍惚未必當日之真傳余過長沙弗
覺偶至湘潭返船直肩輿而迅步遂冒雨而陟巔喜胸
襟之豁滌獨坐翫而弗旋昔韓退之嘗千搜而萬索至
咨嗟而涕漣余實迷途之未遠無亦此生之宿緣

山中早秋

春夏詎能幾淒淒白露還秋容先到草客意未離山石
鼠窺禾去清蟬抱樹間人生衣食外焉用苦間關

江心寺除夜

偶過江心寺何期又歲除百年俱逆旅信宿即吾廬岸
隔遙沽酒厨寒剩煮魚客游隨處好鬢髮任蕭疎

客中立秋

蒸濕前朝雨淒涼今夜風秋聲先蟋蟀露氣到梧桐頓
覺絺衣薄尤憐旅橐空路河問舟楫明月向吳中

閩關旅夜

已是吾鄉土離家尚十程
疎窗通野色孤枕傍松聲
搖落秋難賦悲歌夜不平
僕夫催曉發燒燭待雞鳴

南岳舟中

吳門一水接楚塞衆山連
書史同昏旦江湖且歲年
洲迴蘆莽莽檣動燕翩翩
何處為南嶽雲開望杳然

維揚謁文信公祠

萬死艱難地千秋伏臘新
山河終破國天地已成仁
江

橘南中像巖松雪後春徘徊歌正氣不覺淚沾巾

過薊州

燕京八千里復作薊門行
剩有溪山興能忘沙塞情
朔風催短草寒月近長城
流涕二三策何人似賈生

追懷宜黃大司馬譚公

昔年飄泊入燕京
制府憐才意不輕
獻策獨過司馬署
分符旋赴薊州營
祇誇相國知韓信
無復功臣妬賈生
秋草春風今日淚
不堪回首楚江城

元夕宿泉州洛陽橋

春風又渡洛陽橋
柳色青青伴寂寥
回首故園今夜月
滿江燈火上寒潮

李言恭

六首

言恭字惟寅岐陽武靖王裔孫襲封臨淮侯環
衛侍直留守陪京加太保有青蓮閣貝葉齋游

燕諸集

穆敬甫云臨淮詩清遠有調庶幾大歷
中語 胡元瑞云敬美序臨淮詩郭定

襄後一人咸謂寔錄予
以惟寅文雅尚當過之

詩話李惟寅詩如四姓小侯橋門列
席雍容韋帶哢咤鼓鼙之氣都盡

花朝

二月寒猶峭燕山雪未消
春來無草色病裏又花朝
鴻鴈鄉書斷關河旅夢遙
武陵溪上約今已負漁樵

賦得匡廬山

匡廬凌碧落青磴與塵分
湖海遠還見雷霆低不聞
石門鳴宿雨瀑布濕流雲
獨有山人屐常隨飛鳥羣

送陳玉叔郡守淮陰

別思深難遣離魂暗欲銷人隨流水去心共暮雲遙野
市懸高岸江城響夜潮所嗟相憶處風雨正蕭蕭

送仲弟南還兼懷老親

無限離愁匹馬前況多風雨斷鴻邊
輿未得歸潘岳春草何堪送惠連
伏枕夢回滄海月登臨望極白雲天
飄零若見高堂問雙鬢休言異昔年

李僉憲招飲黃鶴樓

勝地慚非作賦才清尊今向大江開
當年黃鶴雲中去

何處梅花笛裏催

一作來

風起

一作卷

潮聲喧島嶼日斜帆

影上樓臺相逢俱是他鄉客衰草淞陽漫復哀

顯靈宮

先帝祈靈太乙祠重來空憶翠華旗殿中香火儀猶具
海上仙人事轉疑客與方書閒指畫老來詩律舊心思
調高身健慚時輩高閣憑闌眼故遲

詩話京師顯靈宮在宮城之西長陵建以祀王
靈官者也靈官藤像長陵每載之軍中有禱輒
驗及金河川昇不可動宣德初拓其祠額曰大
德顯靈宮復建東西二閣嘉靖三年營龍虎殿

以奉元武馬閣中留題者衆以惟寅為擅場其云海上仙人者相傳藤像獲之東海中也

呂時臣 十首

時臣字中甫鄆縣人有甬東山人集

陳卧子云中甫詩頗

有高岑

遺調

詩話中甫以避仇客厯下與李中麓楊夢山切
劇酬和既轉客青州衡莊王邸起高樓東向眺
遠樓成王於望後四日置酒召客時日景既盡
疎星尚微王未肅客坐憑闌語笑已而月上王
歡甚因命曰待月樓請客賦詩中甫詩云川原
夕氣交暝色自相向月猶藏海底人已坐樓上
王賞擊謂得待字義手觴奉之俾居客右晚客
瀋宣王所客死河南中甫年六十治生壙於句

章之夕陽里自撰墓銘後十年乃卒歸櫬葬焉
詩品在中麓夢山之間同時曳裾王門者多遜
之

襄陽蹋銅蹄

青蒲沒漢水白馬度襄陽男兒但得意何處非故鄉

山中吟

桃源渺何許武陵萬仞山緬想秦時人生死桃花間邇
來逾千載曾無幾人間桃樹摧為薪桃源平作田雞犬
入租稅焉可住神仙

交州古劍歌

古交州天陰日落鬼啾啾終宵白氣衝牛斗過客往往
驚回頭主人知此有靈物呼兒掘得雙吳鉤螭蟬半蝕
銅花綠淒淒霜鏹寒光流古來異物不易取令人得之
反生憂放之唯恐蛟龍怒卷之猶畏神鬼愁亟命冶人
復解鑄神器恐遭真宰怒不然仍貯空匣中恣爾含光
在泥土

秋田為李生得衣字

明農兼課子田舍有書幃穠稭霜初下雞豚秋正肥西
風菰米飯落日豆花扉已得遺安計無嫌老布衣

夜懷

起來喧不減策策動涼風月暗蟲聲裏人孤樹影中南
埏寒尚早北地候難同想到鄞江上秋花滿舊叢

留別少府子魯

木落見中州遙連白帝愁黃河臨斷岸明月上孤舟作
客已多歲還家又暮秋思君西下日寒葉滿江流

次李大叅韻留別

河北中秋盡江南九月歸
草深藏虎穴潮滿上漁磯
田舍春新稻山妻補舊衣
到家貧自得莫怪與君違

金山寺

萬古一卷石東南何壯哉
半江截吳楚兩岸瞰樓臺
僧飯蕪城乞人煙鐵甕來
春深龍聽法風雨帶潮回

諸公邀登甘露寺留別

天風飄忽亭袍輕兩度登
臨慰客情疎磬雨催山寺曉

亂帆春放海門晴江迴鐵甕三吳盡潮過金陵七澤平
明日別離何處問斷腸煙樹漫蕪城

再經鍾吾懷許兵馬

去日黃河邊水深不可渡故人久不回今作行人路

鄭若庸

五首

若庸字中伯崑山人有蜚蜚集

李時遠云山人與茂秦齊名其

詩氣格

稍弱

詩話中伯曳裾王門妙擅樂府嘗填玉玦詞以
詵院妓一時白門楊柳少年無繫馬者羣妓患

之乃釀金數百行薛生近充作繡襦記以雪之
秦淮花月頓復舊觀承平勝事雖小堪傳今之
秋兔寒鴉想像昔年之
酒旗歌扇良足豔也

秋涉

蒼山崔巍照秋渚紅樹離離夕陽渡行人涉水更看山
馬足凌兢來復去雲際人家望欲迷松關蘿徑隔煙扉
山僧卧穩西巖寺時有鐘聲落翠微

王內輔三泉將命太嶽

神嶽蟠中極凌虛勢自孤星辰低絳闕雷雨護清都山

色遙連蜀江流直入吳金箱有靈秘到日佩真圖

衛水離歌

天涯何處客愁新濁酒初酣欲問津莫道三秋歸計晚
尊前猶有未歸人

送張甘蘖刺史

衛水樓船曉向東青山南望一重重因君此別增鄉思
目送春帆細雨中

丁小山赴浙東藩幕值余清泉賦別

清秋衡水汎樓船京國逢君已十年漫對綠尊悲白髮
天涯去住一淒然

顧聖少

二首

聖少

一作

字季狂吳江人

留別謝茂秦

相對忽不樂愴然傷我心他鄉有同懷胡為遽分襟憶
昔醉燕市擊筑誰知音意氣獨吾子排難輕千金重以
易水歌兼之吳會吟論交豈不遠投分遂至今我亦慕

三閭南去湘之陰楚山一何長楚水一何深他日遙相思鹿門還可尋

送李汝學還上黨

傾蓋同為客攜尊復送君悲涼誰作賦南北此離羣坂沒羊腸雪山橫熊耳雲相思豈無鴈可待九秋聞

尤嘉一首

嘉字子嘉嘉興人有西陵集

詩話子嘉亦趙康王客穆敬甫錄其詩以比謝四溟句如偶因看竹來僧院不為求魚坐釣磯

頗有自適之趣康王賓客無多而
吾里有二其一則仲舍人春龍也

送劉舍人往太原謁梁李二使君

平原日落雁聲寒送子西游歲欲殘
共惜異鄉裁別賦更於何處解征鞍
山橫熊耳尖如削路遶羊腸曲似盤
自是陳蕃能下榻匣中長劍不須彈

徐渭 十三首

渭字文清更字文長山陰人有櫻桃館集

陶周望云

丈長詩雜出於中晚宋元往往深於法而略於
貌袁中郎云文長詩有一段不可磨滅之氣

如嗔如笑如寡婦之夜哭
羈人之寒起當其放
意平疇千里偶爾幽峭
便是鬼語荒墳
陳卧
子云文長亦有正音
李舒章云文長詩材粗
黠雅人所少然其一往
有雋處如部曲少將新
跨紫
駟

詩語文長詩原本長吉
間雜宋元流派所謂斐
然成章不知所以裁之
者其自評云吾書第一
詩二文三畫四然詩文
未免繁蕪
不若畫品小塗大抹俱
高古也

入燕

董生抱利器鬱鬱走燕
趙賤子亦何能飄然來
遠道行
止本無常譬彼雲中鳥
朝飲西園池暮宿北林
杪感事

復懷人生年苦不早欲弔望諸君跡陳知者少垂首默
無言春風秀芳草

柳元穀以所得晉太康間冢中杯及瓦券來易余
手繪

遙思冢中人有杯不能飲孤此黃兔壺伴千三百稔券
鏹四百萬買地作衾枕想當不死時用物必弘甚尊壘
羅寶玉裹袂賤繡錦豈有纖纖指捧此鍛泥葦存亡隔
一丘華寂迴千仞活鼠勝死王斯言豈不審

送蘭公子

阿翁學師
也揚州人

耶溪芹藻色相伴秋荷老公子竭重来傷心那可道會
日苦無多相別一何早八月廣陵濤一葉渡殘照

俠客

結客少年場意氣何揚揚燕尾茨菰箭柳葉梨花槍為
弔侯生墓騎驢入大梁

陰風吹火篇呈錢工部

陰風吹火火欲然老臬夜嘯白晝眠山頭月出狐狸去

竹徑歸來天未曙
黑松密處秋螢雨
煙裏聞聲辨鄉語
有身無首知是誰
寒風莫射刀傷處
高旛影卧西陵渡
幡底颯然人髮豎
髑髏避月攢殘黍
中流燈火青熒熒
饑魂未食陰風鳴
莫言墮地永為厲
宰官功德不可議

詩話此美錢工部能憫國殤召僧施食而作陰風吹火八句句句警策具體長吉而得其骨髓者也以下單緩拖沓去嘔心人遠矣稍為芟易存之結語尤索然無味

春日過宋諸陵

藁葬未須憐生時已播遷
威儀非舊典世代是何年
過

客悲山鳥王孫種墓田回看龍頭樹似接汴京煙

嚴先生祠

碧水映何深高蹤那可尋不知天子貴自是故人心
山靄消春雪江風灑暮林如聞流水引誰識伯牙琴

懷陳將軍同甫

飛將遠從戎翩翩氣自雄椎牛千嶂外騎象百蠻中
銅柱華封盡昆池漢鑿空雁飛真不到何處寄秋風

與客登招寶山觀海遂有擊楫岑港一窺賊壘之

興謹和開府胡公之韻奉呈

滄海遙連雉堞明登臨喜共幕賓清
千山見日天猶夜萬國浮空水自平
不分番夷營別島願圖方略至金城
歸來正值傳飛捷露布催書倚馬纓

岳公祠

墓門朱戟碧湖中湖上桃花相映紅
四海龍蛇寒食後六陵風雨大江東
英雄幾夜乾坤博忠孝傳家俎豆同
腸斷兩宮終朔雪年年麥飯隔春風

宴遊爛柯山

二首

偏裨結束佩刀弓
道上逢迎抹首紅
夜雪不勞元帥入
先擒賊將出洄中

羣克萬隊一時平
滄海無波瘴嶺清
帳下共推擒虎將
江南只數義烏兵

夏相國白鷗園

白鷗池水拍天平
相對瓊樓入太清
試問歌臺生草處
當時可許外人行

沈明臣 九首

明臣字嘉則鄞縣人有豐對樓集

莫廷韓云嘉則詩豪俊清

婉情至之語

足無古人

詩話嘉則文長同在胡少保宗憲幕府並受少保知遇督府周防嚴密丈長恒戴敝烏巾衣白布漈衣非時闖入或出昵飲夜深猶開戟戶以待嘉則嶽嶽不阿少保遙望見必起立嘗譙將士於爛柯山酒酣樂作嘉則於席上賦凱歌十章吟至狹巷短兵相接處殺人如草不聞聲少保起將其鬚曰何物沈郎雄快乃爾命刻石置山上及少保死請室中嘉則走哭墓下持所為誄遍為訟寃比於文長懼禍發狂者相越矣嘉隆間士大夫以篇什相高最繁富者莫若弇州

於時吳明卿之顛甄洞汪伯玉之太涵李本寧
之大沁山房諸集以及劉子威馮元成余仲房
屠緯真之徒糟丘肉林愈多愈穢下及布衣如
王承父王百穀輩咸以多相尚嘉則先後積詩
七千餘夫安得精然絮之承父則雖饒腐菌間
有神芝即屬禁芻不無遺蕙非若請君之叢菁
荒茅紛然
彌望也

大樹村劉氏少婦打虎行

潤州城南山簇簇四月麥黃桑柘綠大樹村頭劉氏居
短牆幽院參差屋曉炊未罷日始高率地猛虎來咆哮
老小出門盡驚走犬亦吠虎聲嗥嗥虎聞犬聲急轉步

一口斃之如搏兔欲從虎口奪狗還老嫗抱孫逢虎怒
劉家少婦奪老姑氣猛視虎如匹雛手持鋤叉刺虎目
虎血濺面紅模糊昨從大樹村前走少婦滌場猶髻首
弱體孱然花不如徐家女子劉松婦

抗首

抗首望西秦朝廷急用人玉闕疎控扼紫塞滿荆榛痛

昔籌邊賦

錦衣衛經歷沈鍊所上有賦

憐君侍從臣誰為謝安客談

笑淨風塵

送箕仲之衢州

古路三衢外青山太末餘樵迷仙子質廟過偃王徐楚
橘秋全熟吳楓江漸疎舊游題石處好為一躊躇

顧晉卿席上聞其弟益卿憲副南越之捷喜而賦
之

廿年豺虎劇縱橫百粵遙傳一日平再睹樓船橫海出
更標銅柱伏波名天青馬嶂春銷甲雨過龍川夜洗兵
誰道虎頭非將種請纓原只是書生

浣紗石

不見浣紗人空留浣紗石石邊春草痕想見羅裙色

凱歌

銜枚夜度五千兵密領軍符號令明狹巷短兵相接處
殺人如草不聞聲

蘭皋竹枝

東村西村姑惡啼家家麥熟黃雲齊春蠶作繭桑園綠
睡起日斜聞竹雞

過崑山

桃花楊柳共西灣
曾唱菱歌帶月還
春色茫茫今莫問
滿城煙雨過崑山

無題

夢裏相逢恐未真
世間何物不傷春
馬蹄明日天涯路
誰是燈前昨夜人

王寅

二首

寅字仲房一字亮卿歙縣人有十岳山人集

汪

又云亮卿

詞意超逸

詩話仲房少走大梁問詩於獻吉不過遂從少林僧習兵杖海上用兵依胡尚書督府尚書不能用竟以敗晚緝鄉人之詩曰新都秀運集其持論頗偏與岳東伯今雨瑤華相類

吳山秋晚

有客閒居無奈閒為看秋色一躋攀百盤細草斜陽路
二曲澄江隔岸山野寺最宜紅葉後孤鐘偏在白雲間
賞心又得逢僧話此後幽期數往還

答金在衡訊歸

秣陵宮樹葉初飛
客路何人為授衣
我亦驚秋同海燕
故鄉端在社前歸

康從理四首

從理字裕卿永嘉人有二雁山人集

胡元瑞云裕卿近體

閩麗翩翩

布衣之雄

詩話裕卿任俠談兵間關戎幕劉將軍子高建
肅毘陵病革裕卿馳赴與訣經紀其喪扶其柩
至武林遠近皆義之居燕偕黎惟敬輩游西山
其倡和詩僅存餘多散佚太倉曹子念收而刻
之

再至京口有懷金焦舊游

層城舒遠目迢遞送歸鴻歲月更新厯江山憶舊蹤鐘聲春浪靜燈影暮流空媿有東林約無因問遠公

同王必漸言懷

江頭木落鴈初飛客子傷心賦授衣鄉夢不緣千里隔浪遊空說半生非雲山是處堪招隱塵海何年可息機漫向天涯愁極目幽懷已負北山薇

懷顧太學

登樓風雨暮蕭蕭久客離魂黯欲消
楚樹吳雲春寂寞
塞鴻江燕歲迢迢
新愁芳草天涯路
舊事梅花月下簫
今日分飛悲萬里
憑闌搔首思無聊

送陳京兆致政還白下

挂冠東去共稱賢
天外浮雲意渺然
不是逢萌因世難
祇緣弘景嗜神仙
琴中白雪驚人調
江上青山負郭田
無限長干花柳色
春風不乏杖頭錢

郭造卿 一首

造卿字建初福清人諸生為少保戚繼光幕客

有海嶽山房存橐

葉進卿云建初詩諸體無不工

寇退鄉人回口占代書

城南烽火近何如留滯無從訊起居百里便同千里隔
家書翻比捷書疎清秋涕淚唯懷土白髮庭闈正倚閭
欲寫愁心愁不盡憑君傳語到吾廬

王

翹

三首

翹字叔楚蘇州嘉定人嘉靖中倭亂嘗居幕府

贊軍事有小竹集

詩話叔楚工畫竹予嘗觀其真蹟為賦長歌不知其幕府才雄也邑人侯大年述其繪草蟲更精惜未得見小竹集一冊中間贈酬諸將之作居多

賞火謠

并序

吳城六門莫盛於西閭六月初賊舉火焚楓橋達晝夜時宰坐脾睨間飲酒顧望無異平日時烈風大作煙焰蔽天不辨咫尺哭聲遍城内外或指城上云勿啼哭看城上賞火吁有是哉作

賞火謠

金閭門外賊火赤萬室齊燒纔頃刻城頭坐擁肉食人
對火銜杯如賞春城中哭聲接城外宰獨何心翻痛快
憤兵獨有任公子夜半巡城淚不止緹城躍馬出沙河
義師都向湖心死


客夜

山月漸高低燭光有客逗遛衣滿霜淒淒獨夜還自語
茫茫一水遥相望黃花勸酒酒不醉白石放歌歌轉長

弧矢天涯男子事錯將歧路卜行藏

秋懷

碧天大火未全收一雨空庭帶葉流不為無家悲落莫
他鄉燕子早知秋



明詩綜卷五十四

欽定四庫全書

集部

明詩綜卷五十五

十六

詳校官中書

臣

涂日煥

主事銜

臣

徐以坤覆勘

總校官降調編修

臣

倉聖脉

校對官庶吉

臣

潘曾起

謄錄監生

臣

楊恪

欽定四庫全書

明詩綜卷五十五

翰林院檢討朱彝尊編

陳淳 二首

淳字道復後以字行別字復甫長洲人國子監

生有白陽集

張石川云白陽從游衡山稱入室弟子有雲林之蕭灑而無其癖同

石田之高潔而通於和所謂速性風疎逸情雲上者邪錢功甫云先生詩蕭散閒雅恬憺自

然如梧桐半階月楊柳一簾風流水去無佳俤雲意自閒晚涼生竹塢新水溢花渠咸臻妙境

靜志居詩話白陽寫生全學
石田詩亦倣之特少神解耳

畫梅

風引上春香雪弄南枝色為有惜花心樓中莫吹笛

聞鳥

重重煙樹鎖招提野客來尋路不迷纔過板橋塵土隔
落花無數鳥爭啼

彭年一首

年字孔嘉長洲人有隆池山樵集

徐伯臣云孔嘉詩中含沈

鬱之思外被組纈之華聲調和平詞致暢越可
謂風流自命者也 王元美云彭孔嘉如光祿
宴使臣餽餉詳

整而中多宿物

詩話孔嘉人品足亞徵仲何穉孝長歌云隆
池處士彭孔嘉徵仲並軌吳人誇特詩不及

庚申秋書事

內廐傳焚廿四坊錦雲花隊一朝亡渥洼未見來天馬
槃木無聞貢白狼此日朝廷思李牧他時文簿抑揚湯
運籌急為攄長策薄伐宜城古朔方

陸治 二首

治字叔平吳縣人歲貢生有包山遺詩

詩話叔平遊道復之門當時鄉曲之論謂詩得其興畫得其趣然叔平畫以工綴勝詩則與道復同流

治平寺納涼

竹根雨過石苔斑
鐘梵蕭然晝掩關
坐愛微涼生碧殿
忽看飛雨失青山
雲分暝色來天外
風卷潮聲落樹間
最是晚晴宜眺聽
夕陽橫抹蓼花灣

桃花楊柳舞鴨圖

二月吳淞水上灘柳絲風急絮漫漫詩翁賦罷閒凭處
花滿春池關鴨欄

錢穀一首

穀字叔寶長洲人有懸磬室詩

詩話叔寶貧無典籍遊丈微仲之門日取插架
書讀之以其餘力點染水墨超入逸品晚輩敬
廬題曰懸磬室王元美為賦詩所云空梁頗受
落月色北窗靜竢涼風眠者是也手抄異書最
多至老不倦倣鄭虎臣吳都文粹緝成續編聞
有三百卷其子功父繼之吳中文獻藉以不墜
與公瑕伯穀奔
走相門者遠矣

夜登虎丘次韻

遙憶梅花閣還思修竹林煙迷山徑窅雲鎖石苔深香
界期重宿筠亭擬更臨悠然停采艫燈火晚陰陰

居節四首

節字士貞吳縣人有牧豕集

詩話商谷繩削斤
斤不失晚唐家數

晚坐

鴉背夕陽盡柴門暮色初山寒漸風露人語半樵漁落

葉聞堪急蘆花映日疎年年楚江上不見雁將書

雨後

綠嶼青林白練溪
艸深市井路全迷
雲將片雨歸何急
麥釀輕寒秀欲齊
一水遙連蕭寺外
千山不斷石橋西
欲營三徑添松菊
立盡殘陽見鳥栖

重題自畫小景贈戴子文去畫時四十年矣

點染青山四十年
寸縑不改舊風煙
散人漫竊江湖號
未買松江一釣船

村居圖

茅簷日暖燕交飛
雲過牆陰濕翠微
中酒經旬掩關卧
蒼苔渾欲上人衣

周天球 一首

天球字公瑕長洲人諸生

中秋長干曲

玉笙低引紫簫長
不許商音斷客腸
聽到月斜纔入破
飛來七十二鴛鴦

王懋明 一首

懋明字僅初長洲人僑居錫山

毛氏樓居即事

為樓山郭外登眺起幽思
片雨沈江暗孤煙上嶺遲
鴈還逢寄字花發滯歸期
遠念吳山勝春遊恐後時

姚咨 二首

咨字舜咨無錫人有潛坤集

桂亭為豫章萬隱君賦

南山鬱秋霽重巒桂花白高人愛巖棲躋攀理輕策覽
彼雲木秀悠然縱所適結亭青林端幽賞非矯迹冷風
吹霞裾涼月挂石壁襲芳和天倪餌實駐顏色淮南詎
可招此意良自得願貽瑤華音一慰山中客

西樓席上聽梨園琵琶戲贈

少年文采復風流適意吳山竟日留老去不忘歌舞興
琵琶猶載木蘭舟

周詩一首

詩字以言崑山人有虛巖集

皇甫子循云山人詩婉麗以會景俊

逸以宣情春容以達氣真得古人之髓 王元美云周以言如中智芘芻雖乏根具不至出小

乘語

詩話虛巖頻與皇甫昆弟酬和故派亦近之其言云詩之淵妙近體難工而鮮叛選體易似而實離倩衣毛嫱借飾西子始勞髣髴終露本來作者既非匠心覽者又皆庸目乃曰甲幾魏晉乙庶齊梁是何古人之多也斯言可鍼厄言詩藪之膏肓

靈隱寺

靈隱何年寺青山向此開澗流元不斷峰石自飛來竹

覆空王苑花藏大士臺冥探有玄度莫遣夕陽催

唐詩 二首

詩字子言無錫人有石東山房橐

九日登牛首山

牛首登高處黃花細雨前山深寒似臘江遠澹於煙寶刹珠光淨金陵王氣連六龍曾駐輦聽話武皇年

采蓮曲

風微波不起日暮未迴船貪看鴛鴦鳥時時誤采蓮

沈仕一首

仕字子登杭州人刑部侍郎銳子自號青門山

人王道思云青門樂府古詞雜咏遊適之作麗而有則風致藹然邊關諸詩意氣激發於聲律之外殆雄心俠氣有不能自釋者邪岳東伯云青門身本貴介志則清真野服山中江遊海覽新篇雅調遠過齊稱翰墨丹青兼能游藝信乎野鶴之在雞羣祥麟之遊郊外

村居春日

柳堰迷丹日蓬扉啓綠煙人閒啼鳥外興劇落花前野色連三徑山光滿四筵鵬鷗如可解堪作酒家錢

陸楫一首

楫字思豫上海人承父深蔭入國子監讀書有

蒹葭堂稟

次韻送顧龍山南歸

官河春水送行舟君去匆匆不可留須信故園春正好
莫因風雨駐揚州

牟嘉叙八首

嘉叙字寅定黃巖人有霞溪漫稟

趙方崖云先生以布衣處

窮谷游情景物能自得師於語言
之外而不越乎尺度矩矱之中

擬古

二首

驅車出門闌車行復遲遲百艸委霜露涼風正淒其天
寒道路艱問君將何之駕言往宛洛相從遊俠兒遊子
去萬里旋歸竟何時安得附飄風致此殷勤辭

灌木產崇岡鬱鬱蔽層丘芳艸依澗側託蔓相綢繆美
人隔遐方宜為君子仇未及登君堂歲月修已道慨彼
芙蓉花漫爛當清秋采采欲為贈道路阻且修願君保

明哲妾心亦何尤

遊江心寺登康樂亭子

輕舸截奔浪水國散微陰
沿洄眺孤嶼寶塔凌雙岑
茲遊夙有期始得遂幽尋
淵室接梵語花臺遶龍吟
滉漾元氣中日華映珠林
謝公有遺蹟孤亭俯江潯
曠懷寄玄賞海嶠振徽音
清芬詎可挹高情傾古今
西堂夢不返池艸春自深

同方用晦遊西谷

褰裳涉西沚披莽散輕屨稍觀山川異煙火隔墟落沿
洄傍溪曲窈窕入穹壑幽尋葛可捫晻曖路疑錯巖雲
冒巾幘霏翠灑林薄汲深俯重淵采秀跡崇嶧坐聆伐
木音益感良遇樂返策復流憩逍遙展歡譔眷茲丘園
賞胡為就羈縛

漁家用從姪存勇韻

茅茨傍江口斷岸依漁梁榜舟蘆花渚間歌和滄浪日
出水禽散風至蒲帆張青蓑濕不解卧看南山蒼

送馬斗南歸揚州

去年九月黃花秋邂逅與子城南遊高才磊落不易得
竟日尊酒情淹留三年為客風塵裏末路相逢即知己
禹穴探幽興未窮梁園作賦詞堪擬一別嗟余懷故丘
聞君亦欲尋歸舟萍蓬蹤跡本無定使我感慨增離憂
一片孤帆向何處日落雲橫廣陵樹天姥峰前送月明
姑蘇臺畔聽鴻度江煙慘淡江草青衆賓沽酒雙玉瓶
別君惆悵不忍去碧雲回首天冥冥

觀古壁畫山水歌

危樓百尺凌空起古壁丹青畫山水淨掃浮埃據榻觀
筆跡何人乃能爾想當盤礴時巧思妙入神胷中羅萬
象寫出皆天真迴峰疊嶂開嶙峋白波浩蕩渺無垠仙
人宮闕擁出碧雲裏宛如三山隔水無通津松間白鶴
呼不下却思整翮凌蒼旻超然風景異人世四時花木
相鮮新溪林冥密碧艸合又如花源有路通秦人蒼茫
遠勢尤莫測渤澥崑崙看咫尺一葉漁舟歸未歸洞庭

秋淨湘煙碧野橋沙岸曲徑通高樹下有長髯翁恍如
著我圖畫中手攜雲鑱倚青松萬籟不起千山空仰天
一嘯看飛鴻

青田溪上

月出高峰潮上灘叮嚀舟子放舟還蒲帆不掛春流急
又過前溪白鷺灣

陳體文

五首

體文字仲約號寄委江陰學生有友錄橐

劉應谷云

寄委詩靡有承

龔成一家言

詩話仲約早辭學宮肆志詩律築耕舍於郊西
有田數十畝力耕而食賓至必治酒酒酣賦詩
詩有云得魚便覓酒有酒且留人如此即為樂
何須復苦貧無魚亦無酒宜主不宜賓如此即
高卧何愁不及晨可謂達生之士矣平居詩不
留草其友花左室見輒手錄之故名友錄橐五
言不為舊格所拘頗自超脫是時五岳十岳諸
山人率以韋布效縉紳語未免可憎菰蘆中有
此人大
是不俗

雜詩 三首

林間慈鳥鳥哺母聲鳴鳴城上雙鳴梟破巢還啄雛
鞬

鷹飽食肉勁翮翻平蕪不擊城上鴟但擊林間鳥
漢家有通儒窮經三十年腰下鮮尺組囊中無一錢出
門逢高車呵者當其前問之彼為誰牧兒新助邊
明鏡不在遠妝臺當目前只言他人嬖長謂自己妍人
亦不能別鏡亦不能宣遂使效顰子翻希惑者憐

三月晦日作

造化如驅車春歸一何早本為天地客又復客中老榮
華已潛奪安得顏色好君看庭下花開者行當掃

宴起

老覺春無賴朝來起最慵
鳥聲殘夢裏花氣宿醒中
樓日連城下池風過苑通
却悲寒食節歲歲客江東

王襃一首

襃字宗順泰州安豐場人處士艮仲子自號天
南逸叟有東崖遺集

詩話東崖隨父心齋之會稽傳陽明良知之學
吳興沈桐贈之詩云念子賢者後至理早已融
譬彼三世醫指授寧無從詩其餘事然如一室
風過雨三更月到窗好雨應宜早秋花不恨遲

坐雨新亭曉開潮落月時老攜杖屨歸
山谷閒看兒孫種水田亦有活脫之趣

漫成

青春去何速白髮將奈何豈乏大藥資而不棲巖阿擾
擾苦勞生所得諒無多古人貴聞道道在焉問他

岳岱一首

岱字東伯蘇州衛人有漳餘子集

詩話東伯集交友詩為今雨
瑤華猶存次山篋中遺意

征南

安南易姓舊相因封賜還應到海濱
萬里版圖曾郡邑殊方小醜亦君臣
炎風毒霧煩諸將翠羽明珠入紫宸
想見乞降矜面縛天威此日轉陽春

方學漸一首

學漸字達卿桐城人貢生有連理堂集

詩話方氏門才之盛甲於皖口明善先生實濬
其源東南學者推為識志焉如東征句云豈謂
憑陵愁日本至勤師旅出中原宛然空同華野遺響

白雲巖

磴道斜飛瀑巖花半入雲望中孤鳥沒天外一江分竹
柏山樓色旂檀石鼎熏軒然長嘯發清興好誰聞

方學箕

一首

學箕字紹卿學漸從弟有卷石山房橐

劉慎吾贈石

怪石從何得玲瓏自可憐感君同白壁置我小窗前

張士瀾

一首

士瀾字心父崑山人有張氏集

送人還京

臨歧一別酒惆悵故人違
落葉雨中滿歸舟江上稀
路將天欲遠帆逐燕同飛
去去還鄉落無勞淚濕衣

陳鳳

鳳字羽伯更字鳴岐無錫人有石邨橐

穆敬甫云山人

不務奇詭而

意象悠然

詩話明詩人同姓名者甚夥然猶世代相去字里未同至金陵陳鳳字羽伯梁谿陳鳳亦字羽伯兩君詩皆平平既無春城寒食之作可別韓雄始猶兩存終愁雨湮沒耳

春夜阻舟尤村渡華子攜酒見訪

盤谷春雲覆竹扉
夜船燈火宿霏微
故人何意一尊共
野渡不堪孤鴈飛
世路波濤渾不定
客程風雨竟誰依
重來應待晴芳好
柳絮桃花滿釣磯

宿尤邨渡同李思齊

寒煙蒼蒼溪路昏
月出斷岸溪光分
孤舟畏險不復渡
兩人對酌皆成醺
苦憐白日易華髮
所喜青天無片雲
櫂歌漁父杳然去
縱橫野水蘆花村

雨中客至

新水柴門漲碧紗
孤邨煙樹隱漁家
客來湖上偏逢雨
春到江南又見花
沽酒隔鄰傳小甕
打魚深夜出枯槎
浮生莫遣浮名誤
醉裏還驚兩鬢華

朱察卿

四首

察卿字邦憲松江華亭人有朱邦憲集

荆軻

七首無功壯士醜
函封可惜將軍首
秦廷一死謝田光

社稷何曾計存否不知秦王環柱時舞陽在前何所為
當時太子不早遣待客俱來事未知

對簿詩

日出雪不消天寒日亦冷蕭蕭枯楊下危牆見人影對
簿慚予來公門日延頸囚服僮僕嗤囊空吏徒屏懷刑
媿君子惡慝時自省嗟彼羣凶心持石待下井

雨中感懷

春雨久不歇春寒戀衣裳駟馬斷委巷蝸牛蠹空牆卧

讀感舊篇惻惻各悲傷人生貴適意所就何短長屠狗
足成名秦龍終亦亡虎韞腐泥沙繭絲成文章物理有
盈虧人情空較量不如典春衣沽酒澆吾腸

江南

江南千里暗妖氛野哭家家不可聞落日羣狐窺白骨
荒林萬馬卧黃雲將軍不下征夷令使客空傳祭海文
試問九重宵旰處殿頭香氣正氤氲

吳擴 二首

擴字子充崑山人有長吟閣橐貞素堂集

謝茂秦云

子充吐詞新

麗不減唐人

詩話子充游大人以成名嘗於元旦賦詩懷分
宜閣老其友聞之笑曰歷頭第一日懷中朝第
一品官循是懷人卽歲除亦輪不到吾輩此可
入啓顏錄嘉靖間山人若呂中甫謝茂秦之徒
排難報恩不無可取若子充
所謂斗筭之人無足算也

懷伯兄

老至無家別飄零何處邊音書嘗不定生死竟誰傳朔
鴈驚秋思陰蟲攪夜眠空庭孤月下顧影一潸然

漂母祠

賢哉一飯恩千載猶廟食如何漢諸陵寂寞生荊棘

鄭玄撫一首

玄撫字思祈歙縣人有梧野集

折楊柳

嬈嬈河堤柳年年送別離攀條不忍折拭淚強相持弱
態君應惜柔情妾自知春來愁幾許試看向南枝

汪寬一首

寬字子敬祁門人

鸚鵡

被寵翻遭繫能言太逼真主恩非不厚野性詎能馴去
國長憐爾呼名輒應人江南盛雲木何似隴山春

邵正己一首

正己字格之休寧人有玄石山房艸

詩話格之專精
墨務詩亦斐然

銅雀臺

寂寂銅雀望飄飄總帳懸君王遺今日是妾斷腸年舞
影傷羅綺歌聲咽管絃西陵松檟冷日夕鎖寒煙

吳錦一首

錦字有中休寧人有吳有中詩集

送金伯謙北行

浮雲西北征客心渾不住到日屬秋深寒生灞陵樹

吳瑗二首

瑗字子欽歙人

采蓮曲 二首

汧汧蘭槳鳴雙雙
屬玉起不見采蓮人
知在蓮花裏
采得雙蓮蓬
中有百蓮子
一一自生心
外面空相似

吳瓊 二首

瓊字邦珍
休寧人有紫芝社稷

歲暮書事

海上猶多壘
江東未息兵
如何觀察使
遽報武功成
寒
江凝春令
陰霾蔽日明
不堪黃浦路
雞犬寂無聲

旅邸除夕

老至謀仍拙，天寒酒易消。
冰霜愁裏過，鄉國夢中遙。
一歲祇今夜，百年能幾宵。
病懷堪自遣，無復歎蕭條。

葉一清

一首

一清字本靜祁門人

王仲房云本靜詩格
稍落而意旨融洽

遣興

頗怪逢迎懶，經旬不出溪。
草堂一夜雨，新漲忽平堤。
翠篠吟風細，青靄壓樹低。
滄洲意不淺，獨坐領鳬鷺。

汪少廉 一首

少廉字古矜休寧人有汪山人集

邊憤

漠南在昔王庭少內地而今戍鼓多何將突營騎白馬
先朝失計割紅螺虛令互市通蕃貢翻遣降王解漢歌
獨喜郭侯曾一戰十年瀚海不揚波

程 杳 一首

杳字來周休寧人有大石山人橐

東原

翠竹孤村舍黃花曲徑饒
租完無吏過酒熟有鄰招
碧澗當門釣青山隔岸樵
自慚非世用長得任逍遙

戴 壘 一首

壘字子京休寧人

得子秀兄避寇消息

問訊東吳使秋來尚避兵
一身依短劒數口傍孤城
旅食應無定歸舟未有程
此時正愁絕天末斷鴻鳴

程天符 一首

天符字夢甫婺源人

飲酒

昨非未皆非今是未皆是是非皆茫昧寧知譽與毀
于我何悲譽于我何喜時對無極翁翛然鳴綠綺

張應文 一首

應文字茂實蘇州嘉定人有巢居小橐

食新米作

人生欲無涯各各饜梁肉吾獨薄滋味一飽但飧粥屏
居事躬耕辛苦踰三伏瀰瀰白露滋栗栗香稻熟滌我
碌礪場納之疇與軸揚糠已隨風漬水乍離奠欣欣婦
子語足比玉田玉力穡斯有秋薦廟乃嘗穀先民戒肯
播老氏尚實腹感彼桑田巫食新詎非福

張應武一首

應武字茂仁蘇州嘉定人有文起齋集

郊居雜言

屏居兮西郊學圃兮躬稼岸崙崙兮似山水沄沄兮遶
舍鳥嚶嚶兮鳴春草萋萋以迎夏芳菲兮及時有美不
來兮徂謝念我同學兮結珮拖紳紛車馬兮要津蓴魚
懷兮未得猿鶴怨兮無人曷歸來兮郊西劃松竹兮為
鄰晨耕兮午饁作盛世之逸民

張鑾一首

鑾字顯文萬載人多善行年九十三舉鄉飲大
賓壽百有七歲而卒

百歲作

石門茅屋野人家
百番春風換歲華
盡道長生緣辟穀
不知香飯有胡麻

范如珪

一首

如珪字文瑞休寧人

江上

江上西風雨復晴
菰蒲深處釣絲輕
何人隔岸吹長笛
楊柳秋江一夜生

孫良器 一首

良器字貢甫休寧人有九野橐

王仲房云貢甫詩才清思暢言

簡意微過姑蘇一首亂離在目讀之不覺悽然

過姑蘇有感

東吳城外盡烽煙百姓流移半在船
為問秋風舊來鴈稻梁今剩幾家田

鄭孔庶 一首

孔庶字子富歙人

雪後東張碧川

吳橋殘雪漲新痕
客舍無人閣酒尊
不為寒梅覓春信
東風長日不開門

葉果一首

果字果卿休寧人

旅次江夏

歲暮投南楚蕭然一旅身
江山遙對酒鄉里少逢人
細柳舒殘臘疎梅報早春
故園歸未得物候倏更新

汪子祐 二首

子祐字受夫祁門人有石西集

吳國次云石西
詞博而昌調清

而越

貧病

夜讀朝慵起晨餐午未炊邇來貧亦樂真與病相宜過
受三彭錄游憑二仲隨科頭忘日暮倚杖步雲遲

獨行

日杲秋猶暑林棲鬢欲華獨行銷白晝得意見黃花稻

熟莖莖穗薑肥寸寸芽竹堤香漸近水次有漁家

李敏

一首

敏字功甫休寧人有浮丘山人集

發盤塘

朝發盤塘均夕望平陽郭江空雨冥冥無風客帆落

郭第

一首

第字次甫丹徒人隱於焦山嘗為嵩岱游有廣

篇

何元朗云次甫江月不可留山雲坐相失之句駸駸窺盛唐之室

錢塘雨泊

一片迎潮雨。錢塘泊岸逢。煙明六和塔。雲暗兩高峰。茶
熟蓬窗火。香殘野寺鐘。湖頭舊游路。濕翠想高松。

陸九州 二首

九州字一之無錫人

荆溪

東風靜卷游絲長。桃花吹落流水香。美人照水芙蓉裳。
蘭橈玉腕擊波去。欲來不來空斷腸。

鍾廣漢云語皆前人。已道者而其章

法却合

唐音

半山

山深翠微寒
飛花亂如雨
輕風抽布帆
落日在高樹

張文介

四首

文介字惟守
龍游人有少
谷集

湖上晚興

日夕湖水佳
波光皎如雪
沿堤蹋花去
獨行自怡悅
浮香時有無
流螢乍明滅
興盡櫂歸舟
山齋照涼月

九日風雨登吳山亭子

今日復九日自憐猶未還巖亭足佳菊風雨亦躋攀
漠煙中寺冥冥海上山鄉園渺何處空佇白雲間

遣懷

一水斜通棧羣山曲抱城短簷殘雪色遠寺暮鐘聲
茅屋仍加稅天河未洗兵空懷太平策誰問魯狂生

吳江舟中

向夕問舟人吳江將至否須傍微月中繫船好沽酒

王應辰一首

應辰永嘉人

夜遊曲

燕舞起香塵鶯歌出絳脣直須滅銀燭恐有絕纓人

趙綱二首

綱字希大無錫人

黃勉之云希大寄李秀才二十字入唐人詩中未易辨也

黃蘂車

楚人拒滎陽漢事日以亟絳灌亦何為相顧徒失色紀

生何雄哉毛骨無所惜黃蘗甘自焚赤龍乃得出如何
坎下平其功竟淪沒

寄雒陽李秀才

未得吳公薦空憐賈誼才年年三月裏相憶看花來

朱陽仲一首

陽仲以字行失其名遂寧人有青城山人集

李時

遠云文學詩聲調
意境絕類中唐

金溪曲呈方便君

金溪流水發新安一片孤帆兩岸山
估客自吹龍女笛
路人遙指玉郎灘

余慶一首

慶字惟德固始人貢士有障風集

送吳隱君南還

可歎論交日翻成餞別時
空江憐歲晚遠道念歸遲
行色闕鴻鴈鄉心挂柳枝
殷勤一杯酒相勸復相思

邊習一首

習字仲學歷城人尚書貢仲子有睡足軒詩集

王貽上云弘正四傑惟何氏之後最大李氏次之徐氏有子伯虬稱詩吳中名載今雨瑤華而仲子以尚書之胄食貧投徒有遺橐一卷薄暑不成雨夕陽開晚晴其佳句也

雨止

訪舊歸來夕照中
半天涼雨一溪風
須臾雨盡浮雲斂
笑看兒童指蟬蛩

禹龍一首

龍字子化揚州興化人

九日登高

佳辰何事恨相仍，萬里高臺醉復登。
淮海煙塵迷客路，濠梁烽火照皇陵。
牙旗分閫原非將，羽檄徵兵却到僧。
遂使英雄增激烈，不堪遲暮欲飛騰。

官一夔

一首

一夔字舜鳴，平度州人。官府同知，有少泉詩集。

九日

獨有幽懷客，逢秋感慨深。
菊荒三徑雨，荷老半池陰。
歲

月人間世神仙病後心北山高興在殊未罷登臨

張墾一首

墾字禹卿南昌人生員有白榆園橐

送仲逸同懋功太守遊滇池

滇南西去在天涯匹馬先看楚地花但有故人嚴僕射
杜陵隨處即為家

陸光宙一首

光宙字與嘗平湖人有鉏餘橐

詩話與嘗隱居郊園與宗旭初腸瘳之璞君瑕
輩一十八人結文酒之社晚夢一道士持陶靖
節小像索題諦視之即已也題云在晉為淵明
躬耕辭五斗昔以節自持今惟義自守千載復
歸來春風吹五柳曾識白蓮人遠公是吾友蓋
十八人中有白蓮道人如本也翌日復作偈言
投筆而逝鄉之
遺老至今傳之

歸燕

萬里衡陽鴈春來又北征誰憐失羣影故作斷腸聲朔
漠風猶勁關山月自明素書吾欲寄須到雒陽城

姚充 二首

充字叔信秀水人有玄岳山人詩集

王伯穀云山人詩清

真古澹不

事藻績

興善寺訪戚希仲養疴西林禪房限韻

橋分龍藏北水接馬涇西
一棹通祇苑孤筇引曲堤
梅同殘雪映竹覆濕雲低
不淺陶潛興清尊許共攜

寄懷朱宗魯太醫

憶昔都城醉故人
睽攜二十四迴春
心隨明月長飛夢
目斷停雲欲愴神
藏室書成周柱史
丹箴筆紀漢宮臣

何時得副還山望芝草琅玕共采真

詩話此贈先少保作也少保保御三朝曾撰太醫院志定陵親政後醫或進以金石劑起居未安先公入視疾奏曰聖體病在肝腎宜寬平以養氣安靜以益精帝喜命大璫陸敬書之屏斯叔信詩有丹箴句也

戴乾一首

乾字元泉桐城人嘉靖中處士

述古

英雄一身存安有仇不報覆楚與復楚各不出所料後

此博浪椎報仇志未了進為漢廷傑退偕赤松老成功
匪所期封留豈足道

鄭坤 一首

坤字順卿吳縣人有石南集

俞汝成云順卿詩賦有蕭散清逸之

風

同王駕部遊慧山題秋聲小閣

輞川居士共襟期小閣登攀欲暮時山色可淹今日酒
秋聲還憶去年詩閒雲竹埽無留影老樹藤纏不剩枝

景物漸隨人事謝
隔窗幽鳥未曾知

張虞卿 一首

虞卿順天人

雜詩

青青江上艸
關關洲中禽
物類各有待
因時樂相尋
嗟予久漂泊
感遇情難任
豈無他人好
咸非心所欽
所思在遠道
關河阻重深
寒暑屢變節
魚鳥空浮沈
離憂共誰語
強坐彈鳴琴
孤鸞與別鶴
此曲傷人心

王叔承 十四首

叔承初名光徹以字行更字承父晚更字子幻
吳江人有吳越遊閩遊楚遊嶽遊諸集

詩話承父才情奔逸下筆不能自休其論詩不甚傾心王李大指謂事與景者天地所自有之物偶遇而收之情與意者吾所本有之物偶觸而發之彼吾役也吾不彼役也斯言良是惜其所作牽率者什九王元美序之稱其句就而色自傳篇就而用恒有餘驟讀之恍然若新既諷之而又恍然若故王敬美序之稱其能以牛溲馬勃為樂餌嘻笑怒罵為文章蓋皆寓貶于褒之辭而承父自負其才受二美之籠絡不覺也平情而論承父亦安能敵元美即就宮詞百首

而觀已遠出元美之下特其卷帙繁富不減弇州詩部爾當嘉隆間布衣稱詩若沈嘉則王伯穀及承父三人咸以多勝人今歷年未久全集流傳日寡後世誰相知為重刊其詩者豈惟重刊覽其全集而不欠伸思
卧者亦稀矣奚以多為

將渡江訪戚世秀阻風雲陽道中作

大江何茫茫晨風颭已夕故人如浮雲可望不可即有夢亦須臾寤言轉悽惻生別時易徂一日三秋隔袖中懷素書零落餘紙墨區區方寸心相看皎猶昔

自桐廬入七里瀧出嚴州舟中懷古

入龍還出龍宛轉千盤經既登桐君廬復憩嚴子亭水
光鴨頭綠山色蛾眉青雲中雞犬隔天際鸞鶴停往往
至人宅選勝開巖坳舊壇秘光彩遺廟虛精靈朱鳥不
可見哀歌許誰聽

題陳從訓所藏惠崇溪山春霽圖卷

惠崇一詩僧宋首柴周尾丹青入禪觀別自通玄理能
於尺素間點染千山水昨登金焦興不孤陳郎示我溪
山圖畫家精工多近俗寫意得神形不足此僧妙趣種

種兼不滿三尺吳興繅針頭毫末密相接有如蠅螟寄
蚊睫或言工勝趙大年又云妙超展子虔只須三日坐
其下一花一草生意全乃知陳郎揮灑信有本恥與當
今畫家混我歌長句君莫嗤惠崇惠崇郎所師

水北菴醉歸書興

水深肥紫蟹稻熟美黃雞溪溪饌秋來賤酒人間處齊醉
歸廬嶽社惱殺太常妻點檢明朝約野橋煙樹西

屯溪乘竹筏抵紋溪作

綠竹揚輕筏，屯溪渡早暉。
魚梁羣鷺下，石碓亂泉飛。
小市環青麓，長橋跨翠微。
前峰仙路近，樹色滿秋衣。

金陵艷曲

綠江天作塹，翠嶺石為城。
柳暗黃金塢，花明白玉京。
春風十萬戶，戶戶有啼鶯。

揚州歌 二首

二十四橋邊，當壚最可憐。
妝成窺客坐，不耐數青錢。
東家女十三，西家女十五。
夜半褰娘啼嫁與并州估。

益卿簡寄家兄酒錢志感

異姓憐兄弟天涯寄酒錢
急難那得汝我妮鵲鴿篇

觀音巖訊蘇道人適山頭虎

層巖飛茗煙道人正高坐
牧童折山花笑指神虎過

西湖雜興

看花須近寒食看潮待過中秋
二月十五花信八月十

八潮頭

荆溪雜曲

二首

賣殘竹菌筍還來收罷蘭花蕙又開
但焙茶芽先穀雨
不愁虎跡遍莓苔

蜀山山下火開壺
青竹生煙翠石銷
笑問山娃燒酒杓
砂坏可得似椰瓢

竹枝詞

白鹽出井火燒畬
女子行商男作家
幢布紅衫來換米
滿頭都插杜鵑花

黃姬水 一首

姬水字淳父長洲人省曾子有白下高素二集

王元美云黃淳父如比里名姬作
酒糾才色既自可觀時出後語

送汪太學遊江都

千里王孫歸未能風雲意氣每超騰
年來裘馬遨遊處不是金陵即廣陵

王穉登 十二首

穉登字百穀一字伯固長洲人國子監生有晉
陵金昌燕市客越青雀竹箭梅花什荆溪松壇

諸集

詩話百穀詩亦華整第嫌肉勝於骨至袁文榮
所賞色借相公袍上紫書生薄命原同妾等句
媚寵之詞近於卑田乞兒語矣近見選本甄錄
太繁予刪其什九而風骨始刻露嘗鼎一臠未
為不知
味也

送吳郎遊金陵

兩地三春別孤帆千里愁君今遊帝里誰與共仙舟夜
雨連瓜步春潮滿石頭長干管絃地走馬莫淹留

送慧師還五井兼懷其故師楊伯翼

持鉢南歸去長天接遠汀
未霜吳樹赤過雨越山青
帆外桃花渡函中貝葉經
還將二泉水一酌子雲亭

婁東訪顧靖甫

訪爾山城下秋風一徑偏
溪魚名箭鏃野菊類金錢
艸廢歸吳宅潮通入楚船
馬鞍峰頂石把酒憶當年

看梅過玄墓山中

橋外花開日分明雪作圖
不將他樹雜未有一家無
多處半青嶂香時過太湖
濁醪元易得市遠亦須沽

送吳中丞之金陵

建業青山是帝都
暫勞開府握軍符
花間朱鷺饒歌曲
江上黃龍水陣圖
玉節中丞新盪寇
樓船諸將舊平吳
不知燕子磯前地
容得陳琳草檄無

邊警

琵琶洲上香山澳
來往初通海上艖
漸習文書通漢語
別居城郭慕中華
餘甘却載西商舶
吉貝先歸市令家
島寇須防勾引漸
斧柯莫待翦萌芽

長安春雪曲

春風吹雪下桑乾添得城中一夜寒
鵲樓高消不盡
長安街上馬頭看

都下寒食

騎馬尋春春尚遲東風空自向人吹
燕王城裏千株柳
寒食來看未有絲

望湖亭

亭邊楊柳水邊花落日行人正憶家
不及江南湖上寺

木蘭舟小載琵琶

湖上梅花歌

二首

山煙山雨白氤氲
梅蕊梅花濕不分
渾似高樓吹笛罷
半隨流水半為雲

虎山橋外水如煙
雨暗湖昏不繫船
此地人家無玉歷
梅花開日是新年

清明前一日慈雲菴訪怡菴上人

春風駘蕩日初晴
與客尋僧入化城
牆裏杏花牆外柳

始知佳節近清明

梁辰魚 一首

辰魚字伯龍崑山人有遠遊橐

詩話伯龍雅擅詞曲所撰江東白苧妙絕時人
時邑人魏良輔能喉轉音聲始變弋陽海鹽故
調為崑腔伯龍填浣紗記付之王元美詩所云
吳閭白面冶遊兒爭唱梁郎雪豔詞是已同時
又有陸九疇鄭思笠包郎郎戴梅川輩更唱迭
和清詞豔曲流播人間今已百年傳奇家曲別
本弋陽子弟可以改調歌之惟浣紗不能固
是詞家老手詩律猶未細獮能駢贍而已

登西塞山訪張志和遺跡

晚登西塞山脩然出林薄諸峰自南來茲嶺獨窄峭攀
援上蘿磴翠微構蘭若清楚懸香林法鼓時聞作零雨
飄巖阿殘雲卧松閣緬懷玄真子雅志甘寂寞雲鴻入
冥冥孤飛避縉繳風雨湖上歸浮名寄蓑箸斯人邈千
載高風滿寥廓伊余慕肥遯世故還束縛名境雖盤桓
猶未諧宿諾何時返初服於焉此棲託

夏口泛舟荆溪暮宿湖口

五月荆溪上驚湍走白沙風檣欹聽燕浪櫂遠衝花山

勢通吳直溪流向月斜維舟見漁火深樹有人家

秦嘉禾

二首

嘉禾字吾田桐城處士自號大龍山人有彭澤
豪

小孤山

砥柱從開闢中流自古今神龍常在窟怪木不成林絕
頂雲流影懸崖鳥過音吾題百丈壁仙跡倘相尋

汎湖

汎汎楓湖十里中
薄雲細浪夜初融
月明會聽雙龍起
我欲騎之到海東

汪 汧 一首

坦字仲安鄞縣人國子監生有石盂集

夜上嚴灘

上灘似牽羊下灘如走馬
灘高月未出亂石怒流瀉
離離嚴際星風雨聲在下
夜久漁火明疑是披裘者

徐 韋 二首

韋字明佩江陰人國子監生有觀夢菴集

重經故居

荒臺歌側柳凋零故里重過悵獨行燕子不來花落盡
夕陽偏傍斷橋明

過復元從孫

銀蠟風多護錦屏飛觥不逐舞腰停當筵莫唱江南曲
白髮周郎已倦聽

沈倬

五首

倬字道章吳江諸生以子琦琬珣貴累贈通奉
大夫有紀志豪

松際月

清風湖上來徐徐入松下風吹松子落拾之欲盈把月
出松際雲清光滿籬舍

題張師清望樓

曉色臨平野高樓屬斷雲連峯當戶入一水傍階分樹
影參差動禽聲上下聞主人方擁傳莫草北山文

送別

空城積雨煙霧深
驛亭迢遞江沈沈
桃花一樹感春淚
楊柳萬條驚別心
燕趙古來多結客
秦淮道上誰知音
丈夫意氣偶相得
脫贈豈惜雙南金

月夜

明月吐夜光
寒影在溪水
山人抱琴來
坐久秋雲起
花溪客舍

孤燈坐來昏
淒其不成宿
夜鶴忽驚栖
翻飛入修竹

卓明卿 一首

明卿字徵甫仁和人以太學生選授光祿寺署

丞有集

葉茂長云徵甫詩華
瞻和暢才調過人

江上別黎惟敬

執手河橋上遙天起片雲仙帆千里發客路一江分桂
嶺先秋色樟亭半夕曛家山到何日兩地惜離羣

陳九州 一首

九州字維同江陰縣學生

夜泊荆溪

細柳湖邊岸青蒲水上舟
星隨孤月動山入暝煙收
鼓柁聞漁浦懸燈見佛樓
客途春欲盡歸思滿滄洲

王逢年 一首

逢年字舜華初名治字明佐崑山人同祖之子

諸生有海岱集

王元美云明佐綿
麗宏博纏纏不竭

秋曉聞鴈

北斗橫天秋夜闌朔雲遙度鴈聲寒
夢回旅館燈初落

書寄衡陽葉未殘隱隱斷行迷極浦蒼蒼斜月帶長安
湘南塞北關情遠人倚青樓幾處看

汪時元 一首

時元字惟一休寧人

九日舟中

秋風葉正飛江上逢重九人世幾登高寂寞黃花酒

周青

士云詩有不必深言而
選家必錄者此作是也

袁景休 三首

景休字孟逸吳縣人

詩話孟逸隱於卜肆歿後閩人林古度寓法水寺見孟逸夫婦停棺于寺傷其無子取摺疊扇畫兩棺貯破屋中上雨傍風極悽慘之狀題詩其上有新安客見而憫之出私錢庀窀穸古度又口授遺詩刻之成集余購之不得續谷蔣氏藏孟逸墨蹟五翻凡十絕句亟錄三首孟逸夙見知於沈嘉則其送嘉則詩云道上霜寒連白鴈馬頭木落見黃河殊有爽氣宜其訕笑詆諆及劉子威侍御也

入慧慶寺

新秋入古寺涼氣何清越樹杪夕陽微山蟬鳴不歇

春日過南城

黃鳥當三月城南景正繁
桃花千萬樹不異武陵源

自江村望虎丘

茲山奇且麗迴與江村合
幽人去復來斜陽在孤塔

王受甫一首

不知何許人詩載袁中道游居錄

題九山壁

一心貪與白雲期解帶歸來任所之
每過名山經月住

蘇門山上更多時

袁小修云九山去輝縣十里上有斧
劈石石上題詩後云嘉靖癸卯受甫

不知
何人

明詩綜卷五十五